

# Jangan lupa salur sumbangan

*Graduan diingatkan libatkan diri dalam aktiviti kesukarelaan*



Tunku Ismail menyampaikan Anugerah Profesor Emeritus kepada Mohammad Zainal.

**KAMARUL HALIM M KAMAL**

**BATU PAHAT** – Semua graduan Universiti Tun Hussein Onn Malaysia (UTHM) diingatkan agar tidak melupakan tanggungjawab sosial kepada masyarakat dan negara dengan alasan kesibukan membina dunia kerjaya masing-masing.

Pemangku Raja Johor, Duli Yang Amat Mulia (DYAM) Tunku Ismail ibni Sultan Ibrahim bertitah, graduan perlu melibatkan diri dalam aktiviti kesukarelaan sama ada melalui pertubuhan atau badan profesional yang menyalurkan sumbangan untuk membantu kemakmuran masyarakat, keselesaan persekitaran dan keamanan sejagat.

“Dalam kesibukan mengejar dunia kerjaya yang kukuh, sepatutnya kita juga tidak lupa untuk menyalurkan sumbangan tenaga dan kepakaran dengan melakukan kerja-kerja

sukarela.

“Jangan biarkan diri terbelenggu di bawah tempurung kerjaya rasmi semata-mata sehingga terputus daripada jaringan tanggungjawab sosial kepada masyarakat dan negara,” titahnya pada Majlis Konvokesyen Ke-12 Universiti Tun Hussein Onn Malaysia (UTHM), di sini, semalam.

Pada majlis itu, seramai 2,775 graduan telah dan bakal menerima diploma dan ijazah masing-masing pada sesi konvokesyen selama dua hari.

Tunku Ismail turut berkenan menyampaikan penganugerahan Profesor Emeritus kepada Prof Ir Mohammad Zainal Md Yusof.

Baginda juga menyaksikan memorandum perjanjian (MoA) antara UTHM dan Taman Negara Endau Rompin membabitkan kerjasama penyelidikan berhubung khazanah flora dan fauna di taman negara itu.

MoA itu ditandatangani oleh Naib Canselor UTHM, Prof Datuk Dr Mohd Noh Dalimin dan Setiausaha Kerajaan Negeri, Datuk Obet Tawil.

Tunku Ismail bertitah, graduan merupakan peneraju kepada pembangunan intelek generasi muda hari ini.

Justeru, graduan perlu menjadi contoh dalam usaha menerapkan budaya ilmu ke dalam masyarakat.

Dalam titahnya, graduan perlu menjelajah dunia ilmu melangkaui apa yang terdapat dalam buku-buku kuliah di kampus sekali gus memperluaskan budaya membaca merangkumi pelbagai bidang supaya menjadi generasi muda berpengetahuan luas dan matang.

Selain itu, Tunku Ismail turut mengingatkan para graduan supaya tidak melupakan jasa dan pengorbanan ibu bapa yang menjadi tunggak kejayaan mereka.